

【如意通】

（科註第四四八頁第七行）

《三藏法數》「如意通有三種」條：〔出大智度論〕謂菩薩智慧

具足，神變莫測，凡所作為，舉念即成，無有障礙，故名如意通。

一、能到如意：謂具此通者，雖長江大海，重關復嶺，千萬里之遠，俱無間隔，意欲到處，身即隨到，故名能到如意。

二、轉變如意：謂具此通者，能令世間所有諸物，大者作小，小者作大；一變為多，多變為一，故名轉變如意。

三、聖如意：謂具此通者，化現無方，應變不測，雖無生滅，而有機則生，無機則滅；雖無去來，而有感則現，無感則寂。如意自在，不可思議，故名聖如意。